

**(Prečišćeni tekst: „Službene novine Federacije BiH“ br. 16/14; 58/14; 75/14, 20/15 i 93/19)**

Na osnovu člana 19. stav 1. Zakona o Vladi Federacije Bosne i Hercegovine ("Službene novine Federacije BiH", br. 1/94, 8/95, 58/02, 19/03, 2/06 i 8/06) i člana 10. Zakona o reviziji privatizacije državnog kapitala u privrednim društvima i bankama ("Službene novine Federacije BiH", broj 55/12), Vlada Federacije Bosne i Hercegovine, na 42. hitnoj sjednici, 13.02.2014. godine, donosi

## **U R E D B U**

### **O OSNOVAMA ORGANIZACIJE I NAČINU POSLOVANJA AGENCIJE ZA REVIZIJU PRIVATIZACIJE U FEDERACIJI BOSNE I HERCEGOVINE**

#### **1. OSNOVI ORGANIZACIJE I NAČIN POSLOVANJA**

##### **Član 1.**

Ovom uredbom uređuju se osnove organizacije i način poslovanja Agencije za reviziju privatizacije u Federaciji Bosne i Hercegovine (u daljem tekstu: Agencija). Agencija je samostalna institucija Federacije Bosne i Hercegovine (u daljem tekstu: Agencija).

Agencija obavlja poslove propisane odredbama člana 7. Zakona o reviziji privatizacije državnog kapitala u privrednim društvima i bankama ("Službene novine Federacije BiH", broj 55/12 - u daljem tekstu: Zakon).

Agencija ima javna ovlaštenja u skladu sa odredbama člana 8. Zakona.

##### **Član 2.**

Agencija ima svojstvo pravnog lica.

Sjedište Agencije je u Sarajevu.

##### **Član 3.**

Naziv Agencije je: "Agencija za reviziju privatizacije u Federaciji Bosne i Hercegovine".

Skraćeni naziv Agencije je "ARP FBiH".

Agencija ima pečat i štambilj.

#### **2. NEZAVISNOST AGENCIJE**

##### **Član 4.**

U obavljanju poslova iz svog djelokruga u skladu sa odredbama Zakona i ove uredbe Agencija je potpuno samostalna i nezavisna.

### **3. ORGANIZACIJA, UPRAVLJANJE I RUKOVOĐENJE AGENCIJOM**

#### **Član 5.**

Organizacija, upravljanje i rukovođenje Agencijom uređuje se ovom uredbom i drugim općim aktima Agencije, u skladu sa Zakonom.

#### **Član 6.**

Direktor Agencije predstavlja i zastupa Agenciju, rukovodi radom Agencije i odgovoran je za njen rad.

Direktor Agencije, uz saglasnost Vlade Federacije Bosne i Hercegovine, donosi Pravilnik o unutrašnjoj organizaciji Agencije za reviziju privatizacije u Federaciji Bosne i Hercegovine, Pravilnik o plaćama i drugim primanjima zaposlenika Agencije, Statut Agencije.

Direktor Agencije obavlja i sljedeće poslove, a naročito;

- a. donosi Etički kodeks i druge opće akte u skladu sa Zakonom i ovom uredbom,
- b. donosi godišnji plan rada Agencije koji usvaja Vlada Federacije Bosne i Hercegovine,
- c. Vladi Federacije Bosne i Hercegovine podnosi izvještaj o radu Agencije jednom godišnje

Direktor Agencije obavlja i druge poslove u skladu sa Zakonom.

#### **Član 7.**

Direktora Agencije na period od pet godina imenuje Vlada Federacije Bosne i Hercegovine.

Za direktora Agencije može biti imenovano lice koje ima najmanje VSS i pet godina radnog staža u struci.

Za svoj rad, direktor odgovara Vladi Federacije Bosne i Hercegovine. Direktor Agencije ne može biti zaposlenik u preduzeću (društvu) ili nekom drugom pravnom licu.

Visinu plaće direktora Agencije će posebnim aktom odrediti Vlada Federacije Bosne i Hercegovine.

#### **Član 8.**

Vlada Federacije Bosne i Hercegovine će razriješiti dužnosti direktora Agencije, ako:

- a. nije sposoban da vrši djelatnosti te službe zbog zdravstvene nesposobnosti,
- b. je bio upleten u ozbiljan prekršaj koji znatno oštećuje interese ili autoritet Agencije, po nalazu nadležnog organa,

- c. je osuđen za krivično djelo, koje ga čini nedostojnim za vršenje službe,
- d. izgubi povjerenje Vlade Federacije Bosne i Hercegovine.

#### **Član 9.**

Direktor Agencije može podnijeti ostavku koja mora biti pismeno obrazložena. U slučaju podnošenja ostavke iz stava (1) ovog člana direktor ostaje na dužnosti do razrješenja, a najduže tri mjeseca od dana podnošenja ostavke.

#### **Član 10.**

Direktor, zaposlenici i zastupnici Agencije ne smiju primati nikakve novčane ili druge darove, ako bi to moglo uticati na njihovu objektivnost u obavljanju poslova za Agenciju.

#### **Član 11.**

Agencija je dužna zapošljavati revizorsko i administrativno osoblje koje ispunjava uslove za obavljanje poslova iz njene nadležnosti oglašavanjem Javnog konkursa, u skladu sa posebnim uslovima utvrđenim Pravilnikom o unutrašnjoj organizaciji radnih mjesta Agencije, osim direktora Agencije kojeg neposredno imenuje Vlada Federacije Bosne i Hercegovine.

Zakon o državnoj službi u Federaciji Bosne i Hercegovine ("Službene novine Federacije BiH", br. 29/03, 23/04, 39/04, 54/04, 67/05, 8/06 i 4/12) neće se odnositi na zaposlene u Agenciji.

Ako prava i obaveze zaposlenih iz radnih odnosa nisu regulisani Zakonom i ovom uredbom, primjenjuje se Zakon o radu Federacije Bosne i Hercegovine.

Struktura zaposlenih u Agenciji odražavat će okvirno nacionalnu strukturu stanovništva Federacije Bosne i Hercegovine prema posljednjem popisu.

### **4. FINANSIRANJE AGENCIJE**

#### **Član 12.**

Sredstva za rad Agencije osiguravaju se iz Budžeta Federacije Bosne i Hercegovine na osnovu finansijskog plana u skladu sa odredbama člana 11. Zakona.

Finansijski plan iz stava (1) ovog člana Agencija priprema u skladu sa članom 20. Zakona o budžetima u Federaciji Bosne i Hercegovine („Službene novine Federacije BiH“, br. 102/13, 9/14 isp. i 13/14).

Izuzetno od stava 2. ovog člana, Agencija priprema finansijski plan za 2014. godinu u roku od 30 dana od početka rada.

Agencija dostavlja Vladi Federacije Bosne i Hercegovine na odobrenje godišnji plan rada do kraja tekuće za narednu godinu.

## **5. PRELAZNE I ZAVRŠNE ODREDBE**

### **Član 13.**

Propise predviđene odredbama člana 6. stav 2. ove uredbe donijet će direktor u roku od tri mjeseca od dana stupanja na snagu ove uredbe.

### **Član 14.**

Ova uredba stupa na snagu narednog dana od dana objavljivanja u "Službenim novinama Federacije BiH".

V broj 274/2014  
13. februara 2014. godine  
Sarajevo

Premijer  
Nermin Nikšić, s. r.